



Sujet:

Die neye Ryslaifer

Z Basel sitzt sit kurzer Zit
 Ä Truppe wome kennt wältwit,
 Si zieht e Spuur vo Bluet und Drääne
 Bis zu ihrem Hauptsitz ane.

Zerscht blibt alles hinter Muure
 Will Rächtsawält mit Klage luure,
 S heisst d Hälfertuppe do in Basel:
 Bratschi, Wiederkehr&Buob und Glasl.

Ä Namme schellt sich trotzdem use:
 Spicer Tim, es kunnt eim s Gruuse
 Söldnerkönig isch si Ruef
 S gschäfte mit em Dood si Bruef.

Als Chef vo Aegis stellt är zämme
 E Verwaltigsrot mit grosse Nämme,
 Die nöie Ryslaifer persee
 Stelle si Privatarmee.

Wo Bsater, Diktatore wiete
 Duet me sini Söldner miete.
 Neuguinea, Irland, Sierra Leone
 So heisst ä Teil vo de Statione.

Bi mir, do weggt di ganzi Sach
 D Erinnerig an friehner wach,
 An Heimweh und an Hellebarde,
 Und sogar an d Schwyzer Garde.

Vor dr Schwyzer Söldnerschicht
 Gän eim alti Lieder Bricht,
 Arbetslos und wägem Gäld,
 Ziehn d Schwyzer Ryslaifer ins Fäld.

Me zitteret an jedem Egge,
 Ihre Ruef isch Angscht und Schregge,
 Mord und Doodschlag ihre Spuure
 Am Schluss hört me die Gliebte truure.

Z Frankrich schütze si dr König
 Gege s Volgg z Paris, s hilft weenig,
 Nocher gohts für Söldnerlohn
 Aegypte zue für dr Napoleon.

Arabi, Ryslaifer und Alti Schwyzer
 Göhn zruug uf d Zit vo Gwalt und Glitzer.
 Mit dr alte Gschicht macht Schluss
 Dr Untergang am Beresina-Fluss.

Ins Fäld ziehn mir hüt nümme vil,
 Dr Rollewächsel isch subtil:
 Als Hauptquartier und Stüroase
 Verdient me sich die goldig Nase.

D Ryslaifer sälber sin wit wägg,
 S isch alles suuber do, kei Drägg,
 Weme nit will, muess me nüt gsee
 Im Irak do kämpft d Armee.

Statt Hellebarde, umebrülle,
 Sin Kaugummi und Sunnebrülle
 Und s Gwehr im Aaschlag, schussbereit,
 Was Angscht und Schregge wiiter treit.

Us Auto schiesse si wie nüt
 Uff wehr- und waffelosi Lüt:
 „Shoot Trophy“ heisst dä Dood-Verheisser
 Vo de Söldner vom Tim Spicer.

Wenn d Kugele durch s Hemmli schloht
 Weisch nit worum wird alles Rot?
 Spicer Tim isch denn zur Stell
 Wens abgoht ufem Wäg zur Höll.

So kunnt die nöi Ryslaiferei
 Urplötzlich zruug nach Basel hei,
 Tiefi Stüüre, Rechtsstaat und
 Dr gueti Schwyzer Ruef als Grund.

Wär s Hauptquartier im gliche Land
 Wie s Rote Krüz hett, weltbekannt,
 Dä profitiert vo Schwyzer Wärt
 Woner är im gliche Zug zerstört.

Doch nit ellei die Söldnertruppe
 Kocht bi uns e dunggli Suppe,
 Es sind bi viile Gschäft, do wett i
 D Söldner numme s Änd vo dr Ketti.

Drum isch für uns dr erschti Schritt:
 Näi zu de Ryslaifer wältwit.
 Hett öbber sunscht am Stägge Drägg
 Au denn heisst für uns: Finger wägg!

D Ladäärne-Uusstellig uff em Minschterplatz und d Waage-
 und Reggwisye - Uustellig bi dr Kasäärne sin vom Määntig
 znacht bis am Mittwoch demoorge! Deert und an de 3
 Verkaufsständ (CINS) in dr Stadt ka me au alli Zeedel und
 Schnitzelbängg, d` Blaggede und dr Rädäbängg kaufe.
